

## E Rais di Kriminalidat

E eskalashon di krimen na nos islanan tin nos preokupá. Kasi ningun dia ta pasa sin un otro insidente di robo, tiroteo, hinkamentu, atrako, òf asesinato. Negoshinan ku ta spesialisá den protekshon pa tienda, kas, plaka, outo, èts., no ta falta kliente. Gobènantenan ta preokupá. Komersiantenan ta desesperá. Puebel ta fadá. Nos tur ke un solushon...AWOR!

Konstant tin papiamentu tokante kriminalidat. Tur klase di “eksperto” ta presentá nan punto di bista “diplomá.” No ta hasi falta di opinion i proposishon pa ku e ilegalidatnan ku ta asotá nos islanan. Ma loke si ta hasi falta ta un **solushon!**

Tin solushon pa e situashon ku nos ta haña nos aden? E kontesta ta un “SI!” enfátiko!...basta nos ta dispuesto pa asept’é. Unda por haña e solushon? Den Palabra di Dios!

Algun ta protestá ku siñansa di Beibel ta antikuá i irelevante pa ku kriminalidat. Ma ta lógiko ku nos ta dispuesto pa skucha proposishon di kualke ken ku ta, ma ta ignorá instruksjon di Esun ku a krea nos? **Nos Kreador sa presis kon hende por funshoná optimal**, i por haña Su plan den Skritura santu!

Pensa tokante e rais prinsipal di kriminalidat. Estudionan ta revelá ku e kasnan sin tata ta produsí un porsentage grandi di kriminalnan hubenil. Yunan ilegítimo tin mas chèns di lamta den pobresa, mas chèns di tin problema na skol, i mas chèns di kometé krimen. Charles Murray, di *American Enterprise Institute*, a skirbi “yunan ilegítimo ta e problema sosial mas importante di nos era—mas importante ku krimen, droga, pobresa, analfabetismo, ònderstant, i falta di kas.” Pakiko? Pasobra **yunan fuera di matrimonio “ta e motor tras di tur otro kos.”** David Blankenhorn, di *Institute of American Values*, ta deklará, “Falta di tata ta...e pronostikadó mas sigur di krimen hubenil—un pronostikadó mas sigur ku rasa òf salario.”

**Ma nos no ke tende e atvertensianan aki.** Den nos komunidad embaraso hubenil no ta mengua, bibamentu ta aseptá sin pregunta, maske e ta falta e pèrmanensia di matrimonio.

Tur esaki ta muestra na e problema básiko. **En realidat, kriminalidat ta un problema moral i étiko.** Hende ta skohe pa hasi malu. Pakiko? Un motibu sigur ta pasobra nos a neglighá di siña e generashon hóben loke ta bon i loke ta malu. Algun asta ta kere ku siñansa moral ta dañino pasobra e ta imponé un pèrspektiva religioso riba e hóben. Segun nan, e hóben mester ta liber pa skohe pa su mes. Ma e mentalidat ei ta nèt e problema! Mayornan a keda ku boka será, lagando nan yunan mes skohe. Awor ku nos ta kosechá loke nos a planta, ku man na kabes nos ta puntra “kon por ta ku nos ta haña nos den e tutu aki?”

Nos ke pa gobernantenan kaba ku kriminalidat...awor! Ma maske gobièrnu tin un ròl importante, e solushon no ta kuminsá ku nan. E ta kuminsá na kas. Ta tempu pa mayornan (pastornan i dosentenan tambe) tuma nan responsabilidad di edukadó moral na serio. Siña bo yunan e Dies Mandamentunan...i **sòru ku bo mes ta un ehèmpel.** Siña nan di Dios, Esun na ken tur hende mester duna kuenta finalmente. “*Pasobra nos tur mester paresé dilanti di e tribunal di Kristo, pa kada un wòrdu rekompensá pa su echonan den e kurpa, segun loke el a hasi, sea bon òf malu*” (2 Korintionan 5:10).

Den un demokrasia, no tin solushon pa kriminalidat apart di Dios i étika. Nos a ekskluí Dios i edukashon moral for di nos bidanan, famianan, i skolnan i a kosechá un katástrofe kriminal. **Nos ta biba komo sifuera Dios no ta eksistí; i si Dios no ta eksistí, anto tur kos ta pèrmissibel i krimen ta inevitabel.**

Nos tin e opshon pa pone edukashon moral i Dios bèk den nos kas i nos skolnan, òf nos por sigui kosechá e fruta epidémiko di kriminalidat. E opshon aki ta keda na kada skol, kada famia, i kada pèrsona.